

四庫全書

集部

欽定四庫全書

牆東類稿卷十六

元 陸文圭 撰

七言古詩

北入穆陵關皆山石崩沙北風塵起行人良苦
因作

大風北來沙觸面行人咫尺不相見寒日無光天地晦
一似項劉睢水戰四山确犖路推車礮壑涓流長一線
土簷煙突兩三家鬼貌鵲形何物變葛盧半語誰能別

公治禽言難復辨古磁濁酒時招飲破甕酸齏聊自薦
吾聞臨菑稱鉅麗十二山河據形便姑尤聊攝舊提封
夷吾小白初營建三歸反坫侈國中九合衣裳出幽鄆
孟姜洵美共翱翔稷下羣遊逞雄辯盛衰氣脉不可測
往來今古更相禪干戈流徙人物換水火崩騰陵谷轉
會使雍門重感慨無復蘓秦昔誇羨山東負海猶如此
六合茫茫難覩遍安得長劍倚白雲手抉狂飈清九縣
出鎮口止見小峯

鎮東小峯獨無侶中峯徐來顧其弟大峯偃蹇背面去
似嫌俗客不與語無奈我行節節高山欲藏身恐無所
訪何菴觀水陸功德

山收雨脚雲氣濕葛藤刺屨穿徑入精廬桃李花漫山
磬鐘聲繞落花間野僧淨設伊蒲供譯說西方如說夢
我方談笑耳不聞寒窗暮對西山雲

即事

南窗陰陰日色薄北窗烈烈風聲惡破衲蒙頭睡正濃

地爐煮餅鐺折脚小奴驚叫老婢嗔我愧口腹煩他人
豪家香閣暖生春人乳蒸豚蠟代薪

壬辰六月旦日記異

六月朔旦昧爽天我夢蝴蝶飛翻翻一聲驚覺不可執
鏗然有物墮我前陰風蕭蕭榻震動褰帷一咤聲寂然
向空抹漆無所覩堂上呼燈人自眠一生學道心勿動
養氣未敢輕先賢元忠昔日鬼移床廳廡之下凡三遷
稚圭卧内見匕首金帶忽置城頭邊二公名德余不及

鬼賊擲揄空自憐神姦無復照金鼎偷兒何暇哀青氈
二端是否吁莫辨一夕倉卒嗟何緣吟哦未斷紙窗白
山寺風雨鳴鐘懸起來搔首空四壁濕薪竈婢愁炊煙
庚子七月書事

今年低窪水生魚去年高亢旱坼龜陰陽似屬天公事
廟堂可是無臯夔勸分納粟令如火老稚依然鵠形餓
嗟汝命薄獨可憐穹官巨室無凶年

臘月二十九日作

夜湯湯塵冥冥大車道上檻檻聲三十餘里天未明一
軒一輜不得寧倚坐兀兀搖心旌天寒歲暮霜雪零嗟
哉客子誰汝令

和曹士開侍御見寄韻

按曹士開名伯起至元中以潘昂霄王侯交薦

拜西臺御史

南臺御史忠貫日當畫妖狐屏無跡端方自是廊廟器
錯落天球間宏璧記曾緩帶理江城猶憶尊前坐談客
春樹相思白日晚月梁入夢青燈夕乘車戴笠高與下

倚樓看鏡今非昔壯心無復夜聞雞莫比司空鬚恨赤
壽王君明

去年中秋月色高吳山痛飲推文豪今年依舊故鄉月
紛紛青紫誇兒曹世間兒曹何足數芙蓉仙人在江浦
握荃懷瑾遺世紛黃卷日與聖賢伍曾攀月桂白邊枝
素娥夜半睡不知覺來薄怒賴自持與仙重約三秋期
一朝功成九霄去小點肯顧偷桃兒城東白髮龍鍾叟
辦香來祝仙人壽長生辟穀未要學千載與君期不朽

察罕布哈忠翊父歿王事母表門閭本官棄職
侍養守制三年一門節孝人所難能作詩美之
王氣初不限中華至性未嘗根六籍門閭節行世所欽
父子忠孝天應惜連環解玉理堅緻老蚌剖珠光的礫
伯也執艾萬人敵血染征衣歸不得空留明鏡照孤鸞
妾顏如花心如石鬢雲漸變蠶絲白蓬首何曾御脂澤
北堂手植忘憂草幸有斑衣可娛老不須遣使寄當歸
兒無遠志歸來早事親日短當愛日祇今三年已素韞

宰予衣錦殊未安溫嶠絕裾非小失

雅宜山在城西五十里有德慶菴在其下穹窿
山福順寺長老紹堯翁作詩取以雅宜為號求
詩

雅宜山低一拳石氣壓華嵩千丈碧不論城市與林丘
愛山例是詩人癖寒泉修竹蒼崖底青山解與高人語
花落猿吟總是機舉似山僧盡成句山僧來獻詩人號
百種不如山色好德慶禪床明月夜館娃人海紅塵曉

我知山心雅好靜
犖确不容車馬造
草堂宜雨又宜晴
藜杖芒鞋時一到

贈道人周大方

原注雙鳳人

道家者流雙鳳仙
迂訪牆東老田叟
叟讀儒書五十年
一事不成今白首
道人過門何所求
期將汗漫東北游
青蛇三尺風雷吼
玄鶴一聲天地秋
吏商奔走日百里
區區嗜利與名耳
道眼視之海中漚
炎夏長途何必爾
吾師之師柱下史
紫氣曾驚關尹喜
當時刺却五十言

馬用老人詩一紙

贈潘道士祈雨

人天相距尺有咫雷電六丁遶吾指藥師馬上寄小瓢
夜半一滴灑千里古湫源竭老蛟泣新秧秀濯田畯喜
匣收寶劍捲陰符師歸宴坐茅峯裏

贈鄭元明術士自言安晚之孫故詩及之

原注鄭安

晚初為教授謁襄帥趙方一見即以宰相期之
且以二子為託端平初鄭果大拜范與蔡皆擢

大聞

梁灝八十有二歲自從天福建雍熙中更乾德五星聚
晚賜龍頭拜玉墀吾今之年灝相若布衣落拓何能為
吟詩獨與熊兒和作賦那求狗監知龍鍾久納少年侮
耿介尤為謫子嗤吾聞長沙趙彥仁豫知鄭相秉化鈞
從容杯酒託二子端嘉之際俱名臣是時宋德已衰謝
扶顛江左尚有人安晚之孫今為庶嗟我與子俱遭迤
不須諛我有許壽且道何時脫子貧清和四月天氣新
共買一醉拋青春窮通壽夭俱莫問蓋世英雄一窖塵

草間惟有石麒麟

贈張明德星士

二曜五緯萬古懸
甘石之學今不傳
術家能以天占人
聖人乃以人占天
仁義禮智性所具
吉凶禍福命使然
命天俵賦定不易
性我受用修則全
經文二百有五字
明德乃在新民先
君從何處講此學
直溯建洛窺先賢
工夫潛深秋日靜
本真瑩靜霜月圓
市聲初散簾欲下
龜筮未收客下馬
一人妄計秩崇庠
一人猥筭資高下

縱橫二位布逆順錯落五行分制化先生拊掌笑且荅
二客相看面如赭徐言至善同一初非愚不足智有餘
萬物不齊氣雜揉是心本明如太虛不須詹尹就決疑
客如不信問子輿

壬申冬晦叔譯史歸別小詩奉餞

蒼頡製字傳義皇鬼神夜哭殊倉黃語言聲律未易下
嗟君楚產學北方又能經術飾吏事筆墨豈足盡所長
郵亭一夕飲離觴他年富貴勿相忘天無烈風海波靜

白雉九譯貢越裳盛時努力早出仕成誦姬旦坐明堂
從聖國珪二茂才叙別

龍門世家史學祖足涉淮湘到鄒魯兒生墮地弧在左
婦閉車中為誰苦二君鴈蕩游虎林逆旅一笑論古心
地爐畫灰事未竟推窗看天雪意深山寒約共梅花語
江水東流予北去明年春風上石渠道傍為我弔望諸
留別山村樂閑菊存愛山梅村并寄景初慎與

國華

南來飛雪如柳花北歸柳花如飛雪乾坤偏仄困羈旅
江山蒼莽驚歲月白雲冉冉千里外滴盡春林子規血
故人回首亂峯青古堠斜陽照離別

送馬伯亨西省郎中

驚吾學問非少年羨君功業當壯年曾聞雞聲共起舞
老我輸君獨著鞭臘寒枯柳不堪折欲別未別心茫然
關塞黑風虎方嘯江湖白浪龍正眠洪都西統數千里
俊乂如林足驅使好將舊榻拂塵埃佳客可能無孺子

送千壽道同知北上

甲寅詔下興賢才吳中多士轟春雷門外鵲袍那可數
一人獨上黃金臺宦途詰曲容不得直向東海窺蓬萊
蓬萊水濶雲氣浮眼看健翮摩天游故鄉六載不歸去
老盡西風菊徑秋歸來四壁亦不惡人羨錦衣君不覺
館娃茂苑正淒涼古汴黃河復漂泊問鄉安在遲一見
承恩內直金華殿從容薇閣演絲綸花間應隔同年面
自恨山中老樗櫟擁腫不堪逢匠石枯梢無復起春風

一生空負吹噓力

送祝君晟之官昌化

九里河梁昔攜手酒酣共折城南柳春風六載忽吹過
浮雲萬事無不有餘生閉戶忍寒餓薄宦隨方困奔走
徑從蓮幙換青衫猶勝兔園嘲白首我床昨夜破却甕
君印何時大如斗肯將車服耀故人未覺來往煩佳友
從今出處可忘言柳邊重飲城南酒

送經之偕義齋兩舍人入燕併呈善之待制

君馬三渡白溝河
溝水東流青草多
踞鞍顧盼聊試耳
伏檻悲歌奈老何
古人千金重然諾
把臂況受生死託
肯先申白獨辭楚
且伴機雲雙入洛
道遠始知離別苦
地僻應思宦游樂
榮名日久當日厭
浮生花開又花落
平世應無戰國材
選賢何日到金臺
寄聲玉堂老仙伯
桂樹秋風歸去來

送節之衡之兩舍人入燕

龍駒鳳雛兩陸子
並駕秋風鞭駮駟
老眼一見失驚喜

定知乃翁元不死生子真足慰人心景升諸兒豚犬耳
滿朝譽翁不容口世祿固應傳不朽為官豈計多得錢
取印終須大如斗我是韓家十八郎里中曾拜北平王
碧梧停鵲已飛去玉雪娟娟今在傍往事傷懷淚如水
矻矻窮年吾老矣欲追霞佩小頡頏手倦束書攜不起
送楊起之安豐錄判

芍陂茫茫古邊城雞犬相聞今樂土交兵往事空流水
避亂居民尚遺堵似聞此地歲豐穰要得清官手摩拊

君才天馬足神駿老大去年參選部閩中實歷裨風憲
淮右先聲動官府爭看祖道車騎衆力疾登途霜月苦
牆東故人懶出門濁酒黃花對誰舞

送黃子高常熟教授

儒科一廢四十年甲寅詔下初興賢雞窗夜半同起舞
竟讓祖生先著鞭去乘駟首燕路歸騎赤鯉游琴川
川中疑有古文學子游故里今依然采芹思樂絃且歌
官况雖清奈冷何省臺衮衮豈足羨燕雀喧啾入網羅

殘春積雨困花柳天氣昏昏如中酒怕逢北客問新事
更恨東人奪佳友暮年離別意鮮懽追思得失空長嘆

詩成寫寄掩關卧夢逐飛絮黏征鞍

原注時宰
輔多被誅

奉餞子華教授北上時癸酉三月

清明上巳三月中一春天氣少冲融瞳瞳初日翳復吐
黃塵漲起西北風有客束書挾兩童南來兩馬一馬驄
舉鞭蕭蕭易水東博徒劍客時相逢怪君體弱心甚雄
聲名壯健驚老翁元英磨室渺無蹤黃金誰為隄築宮

茫茫宇宙今古同天時人事安有終江柳自綠山花紅
送吏貲遷調松江

吏貲務選才具良不問他邦與吾鄉珠金出產已足貴
蘭桂移根亦自香諸君此行良不惡居家何如宦游樂
季鷹曾憶松江鱸士龍空嘆華亭鶴昔人還鄉苦不早
今人離鄉涉遠道漁舟泛澤青茫茫客衣吹霜白皜皜
朱甍結構井邑富畫戟清閑官府好紛紛刀筆心自厭
落落功名身未老要看入海運大鵬不恨出山成小草

送吳子長入京

乙亥江城守宵遁連營錦帳排鋒刃
丁男釋耒兒女啼朱門一夕黃金盡
我時擁卒護鄉井紵袍白馬君來省
石床試劒人血腥地爐傳酒牛炙冷
手揮談麈看落月平明索飯出門別
虎林山頭却寄書一字不問家何如
乾坤風雨旦復旦家家昇平喫飽飯
君才筦庫久繁劇我老詩書更憂患
肯將出處問猿鶴自覺高低笑鵬鷃
浩蕩炎風扇區野斜日征鞍古榆下
功名不復念遠道

富貴自覺顏色好俯仰疇昔予何言梅雨敲窓濕詩草
送羅秋崖

宰相昔起富春山門生四海皆達官牋書爭寶笈雲樣
題詩便隔紗籠看知君相與有瓜葛絕口不道人所難
何不跨鰲上金鑾胡為采芹坐江干羣鵝飛來爭野槥
三鱣不足供朝餐人生榮悴何足歎海水會使桑田乾
當軒下馬昔日盛閉門羅雀今朝閒羣兒瑟縮手不熟
先生落魄猶寒范陽城南丹旆歸何人送者車班班

羊曇獨洒西州淚孟嘗空感雍門彈老樹春殘蝴蝶去
滄江歲晚白鷗還北風吹雪被長巒詩囊酒榼隨征鞍
請君讀詩飲美酒歸日謝客牢閉關世間萬事不須問
西湖柳色差可觀

送吳君遠

登陽幕職無他奇置薤一本水一盂鐘鳴張燭起署事
坐看日落庭西隅鴈行鉗紙走却立高懸明鏡分絲銖
長官堂上口嘯諾時時隔舍聞歌呼荒村人閒花自落

園扉晝靜草欲蕪
褰帷使者上治狀
為出清冰置玉壺
小兒踉蹌老翁怒
細問代者如君無
楚苔漬雨古驛寒
酒酣寫出陽關圖
君行上馬慎勿驅
梅水綠漲南興湖
送黃子高如泰州謁朱南伯

采采江籬步石礧
東望海堤青不斷
故人津上誰飲酒
尺素不來魚尾短
黃子卓犖文更奇
命駕千里赴相思
長江鳬鴈不足數
曠野虎兕將何之
景德寺前讀書閣
彥國九原不可作
寄聲故人加餐食
昨夜秋風淮水惡

送張子野

江淮落南俯閩嶠山水相背風馬牛間關草就北征賦
日暮彈鋏君何求袖中漫刺通姓名猶及慶厯思中州
子京永叔老友白首鶯燕陪風流今無花月聽水調
但見滿目森戈矛長歌送君萬里游天荒地老令人愁

送徐舜輯

原注父果齋出入
信菴中齋之門

彥霖父子魏公客持國之兄招不得豪華落盡漳水流
主人眠石局醉白天傾地坼古今愁浣花窮殺老參謀

窗寒雪壓燈昏夜門靜蟲吟葉落秋平生故人渺江浦
誰往省之遣宗武惜哉赤白兩洪崖敢道交情棄如土
回舟蘋浦思依依空憶桃花鱗鱗肥竹西騎鶴不可去
西州萬里將安歸南山之陽木已老南山之陰木尤槁
不信春風吹不蘓珍重歲寒宜自保

送仲華葛兄

蓉城諸葛何綿綿一門青紫三百年聞孫流落湘江上
手握美瑾懷香荃夜行衣綉豈足榮歸夢晶晶經山川

君家元有紫荆樹一枝兩枝枯或妍當暑歸來憩其下
俛仰陳迹心茫然牆東野人頭雪白乃翁坐上琴書客
鳳毛一見眼雙明豚犬吾兒空自責追思老少各時異
坐閱興衰疑世隔江湖來往慎風波他年重會銅駝陌
送北禪釋天泉長老入燕

金身夢覺白馬東西來禪教各一宗講師高據獅子座
緇素羣集驚盲聾天華咫尺飛墜地夜燭神光滿室紅
遠師道林嗣宗風專談義學離禪鋒三葉五性總超詣

一枝擘與天泉翁不泥筌蹄求解脫不執文字迷本空
黃梅四月上廬龍騎驢不下莫相逢徐州麥飯足可飽
青州布衫誰與縫廬溝橋邊石頭滑飛錫徑入明光宮
手揮玉塵天顏喜身被紅綃帝渥濃回頭却笑虎丘石
夜半不憶寒山鐘君不見懶殘昔住衡山峯使者召之
終不從天寒垂涕石窟中

已卯題吳江長橋二首舊有一橋亭曰垂虹兵
亂毀之復創兩橋亭相對

瓜步投鞭濕馬尾吳江猶是衣帶水陽侯不敢駕風濤
神劍自斷長虹死木罌夜半飛渡軍縛筏驅丁命如蟻
波心兩龍忽跳出一聲金鼓波神泣興廢相望五六載
斜陽獨倚欄干立酒斟波神叫不磨劍鏗冷浸秋蒲碧
江頭朱欄四千尺一望初疑幾十里左約江流右截湖
橋東出日橋西雨漁歌答響遠相失羣鴈旅泊迷葭葦
荒村獨木橫野渡深厲纔能濕衣履乘輿足受雨三人
猶當扛梁涉溱洧書生眼力小如甕一覩巨麗心驚喜

吁嗟人力不可到，毋乃神功役山鬼。
憶昔燕兵下江浙，馬逸風駿卷灘尾。
長驅水陸一時進，錢塘破竹從風靡。
川流衰竭王氣盡，成敗反復固其理。
汴師平，南將彬美南人死，恨樊若水采石浮橋一夕成。
曉出降幡人姓李。
原注：事見長編。若水名若冰，又改名知古。

寧晉李照磨築室奉親，名曰芝室，索客賦之。

口誦嚴君口授書，手提慈姥手縫衣。
寸草安能報春暉，遠志不敢回當歸。
嗟兒客宦游有方舅，姑晨興婦在旁。

手供鮭菜晡下堂几席代汝親扶將白雲英英趙州山
玉琴石榻窗戶閒上池飲罷燕坐閒生香滿室光照顏
鍾英毓秀自乃翁草木臭味將毋同借鋤取帚面發紅
偕飲甘露薰祥風

寄題俞氏草堂

浣花老人溪上住野梅官柳橋西路碧雞坊外少人行
曉帶春星自來去荒基蘚合無尋處峽川萬古流詩句
紫芝之孫居澄江瓊茅結宇青竹窗南牆夜深塔鈴語

古寺白鶴飛來雙索我新吟
寫君趣開卷悠然起幽思
我嘗十年卜山居經營未有
讓西地風流縱似老參謀
資給應無賢錄事願君分
借半間雲勝日當攜茶具
至

題南夫四時佳致園亭

桐川博士老文學出處乃在
可否間舍東支徑劣百步
牆北危亭俯兩山風花辭枝
黏草碧雨竹卸籜連苔斑
林臯紅葉白鴈早江國瓊
英翠羽寒一年天與四時景
百歲人無半日閒擾擾鳴鐘
戒晨起昏昏秉燭愁夜闌

金月
卷十六
蜉蝣生死寄黃壤烏兔飛走凋朱顏主人自得靜中趣
物理常於動處觀從容琴書寓真樂趣迨樽前追清歡
良時佳友不易得惡客未至門先關

題立齋不礙雲山亭

英英山中雲蒼蒼雲外山雲山偃蹇若高士不傍貴人
門戶間藕堂老人家四壁詩句曾參浣花客一亭半落
平疇外拾盡乾坤眼猶窄樵歌斷處起寒青鳥影明邊
際空碧玉鸞不入巫陽夢滿榻凝塵室生白昨宵礎潤

卜雨來岸巾欄角小徘徊忽然一片黑模糊失却萬丈
青崔嵬有風颯然起林薄如覺天日徐徐開推窗看山
色如故斷雲飄零不知處

書范石湖白髭行後

渡江莫盛乾淳間虞范諸賢鬢未斑功名草草負遺恨
老死不見鞏洛山我近經行石湖路范家水名王家墓
風流一代竟漸盡手澤何人為珍護直當慷慨論興亡
奚暇悲歌嘆衰暮

題程子充少監家藏二詩遺墨前一詩程御史
臨終遺其子端甫詩也後一詩元遺山女初適
端甫時送別詩也端甫子充之父元氏子充之
母翰苑諸公題述遍矣

教子惟欲諂嫁女惟欲官床屏觸頭乃翁怒文書銜袖
媒姥謗癡人一笑可絕倒古訓相傳良獨難大夫有愧
程監察上谷敢望元遺山易箒微言尚典刑出門別語
重丁寧子無橐裝與寶劒女無綉褥與金屏各贈驪珠

五十六藏在肺腑為深銘梓喬俯仰俱莫及冰玉清潤
尤相形水衡使者直而溫遺山宅相監察孫提身務學
承先志範世傳家示格言正大去今八十年流風遺俗
猶有存誰能題詩墓栢下使兩仙翁起九原

甲申春張菊存遊洞霄諸公餞詩盈軸越明年
余過故都補行卷之末

春申下邑荒江濱有眼不識錢塘春竭來南北兩高峯
乍見西施真美人曉粧濃淡看不足誓結鶉衣老湖曲

安知湖曲有高人如此仙姿尚嫌俗別尋大滌登天柱
氣壓羣峯三十六歸來書牕風雨夕潛聽三竺山靈哭
謦言玉局老飛仙摩娑銅狄今幾年神蛟飛鼠亦何有
金堂玉室空茫然天風吹醒丹泉酒碧桃津遠人回首
石上禽餘搗藥聲絕憐無訣授長生今年却被山靈笑
依舊湖堤拾芳草

題金陵海月潮卷

太陰朔望有盈虧海外隨之互消長夜半秦淮湧月來

一輪却掛鍾山上山中那得有潮音尊師鼻息如雷響
題尹存菴行卷尹居賈門下鍊金敗後流落海
南依陳文二公寓廬陵中齊頊溪贈之記銘甚
善復回杭州道過索詩

錢塘築塢高於郿黃金鑄成九鼎移木棉羈魂招不得
方士入海從安期廬陵二老當時在翰墨光芒透紙背
爾後空聞化鶴歸我今欲見啼鵲拜長安市上重經過
逢人問是伯休那勸君且尋遂初賦人家國事竟如何

題分宜謝草廬行卷

袁曹官渡爭雌雄
荊州僑寄大耳翁
涕流髀肉消不盡
試與元直游隆中
自有躬耕者布衣
抱膝茅簷下
從容一曲梁甫吟
不覺將軍三枉駕
室中屏人繞數語
跨荆包益成鼎峙
南陽陌上龍出雲
永安宮中魚得水
古今成敗真郵傳
英傑千年不一見
識拔端由品藻公
位置無嫌草茅賤
山中謝客江烟昏
誰攜行卷到柴門
手披康樂草廬賦
知是蘭庭佳子孫
春塘柳禽成昨夢

災興相業更誰論
洞庭三江風浪奔
鯨魚出沒相吐吞
何為四方歸來此
山堂鶴怨能移文

題張南山慶九十詩卷

原注丙寅六月
余年七十五矣

翁今百歲少十年
我少公年二十五
天與翁齡百二十
我已化作原頭土
延年賸得飲食樂
損壽多應作詩苦
梅開儻獲登公堂
一醉猶能戴花舞
兒孫拍手向我語
公漆點鬚貝齊齒
降原陟巘步如飛
飽飯何曾飲人乳
夢中猶記前朝事
二老相逢必歡喜

題王復初所藏子昂臨禊帖

昭陵玉函出人間開平經今四百年永和遠距貞觀先
俛仰陳跡俱可憐古人學書如學仙筆鋒誰入玄之玄
水晶宮裏佳公子風流翰墨皆天然我評逸少非真逸
史載深謀并絕識獨留繭紙博千金似是藝成能掩德
名士由來屢逼真書空咄咄彼何人遺才流落稽山下
修竹娟娟萬古春

題登瀛圖

世傳閻公學士圖意象曠雅難形模山僧臨本持索句
展卷復掩空長吁秦王功高塞宇宙搜攬豪雋供馳驅
內懷矛盾伺同氣外示閒暇耽文儒臨城開館構傑閣
坐見瀛海移西都分番夕宿無厭倦珍膳日給何豐腴
天光下照天策府煌煌星象經天衢房喬夜半進危計
平明一矢驚臨湖羣賢崛起輔貞觀亦有淹滯如顏蘇
惜哉燕翼謀未善祥麟接武容妖狐殿階置笏怒未解
田舍收麥言何諛策名書府真有覲空與老姥扶天樞

貴人一代骨已朽史筆千載心猶誅閻公絕藝今亦無
長安落日明榛蕪

跋明皇貴妃並馬圖

聲殘玉笛梨花月笑指驪泉浴香雪宣來天駟玉花驄
醉傲金勒搖東風阿環並轡微相顧一點芳心情鶯訴
五溪老奴侍鞍側招搖先入華清路行幸東西春復秋
那知憂樂兩相酬朝元警蹕猶清道胡馬長嘶出薊幽
猿聲霜冷巴山曉錦襪遺香清渺渺南內淒涼稀進御

海雲空濶蓬萊小淚濕花容春雨餘縱有丹青畫不如
跋趙太祖與韓王蹴鞠太宗石守信楚昭輔党
進環而觀之

紫微垣近一小星作戲敢與太陽敵諸將旁觀信雄武
不逃書記收兵策開封府尹真天人受譖朱崖疑老臣
幸自宮中啟金匱忍使涪陵竟隕身

題萬戶府瑞麥圖

河中之野木連理文人作頌何所美鯉湖之水蓮雙葩

史臣紀異不足誇木葉饑來豈堪食蓮花遠觀空有色
由來上瑞是豐年芙蓉池外麥連天一莖三穗攢秀穎
好事軍中萬口傳閱武堂成政多暇刀劒不如牛犢價
老農噉飯看昇平奇祥異產從天下香餌先收夏隴雲
雪匙可卜秋田稼絕憐西蜀杜參謀困饑空懷當世憂
崆峒麥熟無人穫且問王師休未休

題劉晦卿月樓圖并餞秋闈之行仍不犯月樓
字

君不見劉越石晉陽鐵騎圍城急一聲長嘯震山谷拋
弓散走羣兒泣又不見庾元規武昌僚佐相追隨坐據
胡床夜笑語不知賓主竟為誰枕戈待旦成何事終讓
著鞭先士稚況復西風塵汚人茂宏舉扇思還第嗟嗟
二子逢世亂誤長清談空致患爭如今夕倚闌人一生
飽喫升平飯百城桴鼓夜不鳴萬里山川秋愈明黃鶴
孤飛白鷗睡捲簾露氣下三更初聽笛聲何激烈再聽
書聲更清越素娥密約無人知今秋丹桂來先折

題金君澤家山飛雲圖

吳姿楚態誰使然白石齒齒山娟娟孤雲欲斷不斷處
中有萬斛瀟湘烟黃榆日晚長洲路木葉山頭幾風雨
一聲寒鴈江南書萱草靈椿解相語解相語君應知山
風獵獵遊子衣畢逋有待何當歸

應昌路驛傍有古松一幹生十八枝為斧所傷
江西胡生圖以示州長官命余作詩

盧龍迤北道應昌八月飛雪六月霜陰風蕭颯百草僵

牛羊隴坂狐兔岡破郵古廟人鬼靜傍植巨木百尺強
孤根綿綿蟄幽土枝幹直上凌穹蒼何年堂堂十八公
會朝侍立冠劍長中有二公能死節張許崛強存睢陽
餘生幸或逃斤斧遠地何由選棟梁西江行客苦好事
一見攜之袖裏藏摩挲老眼識竒怪興作萬里神蒼茫
寒齋無復丁生夢腹內惟聞葵藿香

唐人洗馬圖

君不見雀鼠谷抵介休壁馬甲不解王不食又不見泰

山馬色別為羣東封望之如錦雲英雄角力多相值
倖承恩思自媚不辭汗血千里勞驅死塵沙那得避
何如落日清水灣驂騑獨步春草閒
圍人袒肩沒兩踝控轡欲上未上間
靜觀物理坐嘆息
玉花慘淡何人筆
少陵野老最善評
弟子曾入將軍室

跋牧馬圖

平原淺陂水草甘美
枯梢吹風日落塵起
物色祁連山前路
又似踰關渡隴水
一人解鞍枕欲睡
一人褶袴手

仰指一人持轡却回頭萬馬攢蹄行復止飲者嚙者各
自然馳者忽在立者前駒而幼者隨壯者浴者出沒晴
波川風駿雪尾不受鞭並驅逐者如爭先須臾兩騎獨
殿後戎笠持兵相格鬪老羝挾乳自成羣牧羝人遠傍
無救何人丹青手摸寫礪礪冑中有全馬陸子作詩配
駒野千古傳流好事者

栽桑

細聽鄰婦低眉說年年育蠶苦無葉山童執筐入市賣

一稱百錢猶未愜更兼春雨土窓寒忍見蠶饑頭戢戢
買絲織絹輸官外空借隣機閒一月阿姑卒歲無繻袴
小兒露髀風吹裂今時縣官清且明課民務本令必行
擔桑頰肩荷鋤去青青布種環郊城明年家養一百箔
巷響繰車棟花落滿籠新絲白雪香聽賽蠶官鼓聲樂

賦燒筍竹字韻


先生朝槃厭苜宿筍味得全差勝肉蒼頭掃地犀角出
赤燄騰煙龍尾禿土膏漸竭外欲枯火候微溫酒已熟

撥灰可惜衣殘錦解穰猶憐膚躍玉青青無日長兒孫
草草為人供口腹盧家丞相蒸葫蘆石家無人煮豆粥
去毛留頂有何好搏韭作齏空自速不如野人工食淡
自辦行厨入脩竹句裏曾參玉版禪胷中會著簞簞谷
主人不問不須嗔昨夜西風響林屋

竹鶴窺碁雪字韻

秦馬投鞭江可竭別墅從容謀已決蘭堦小兒呼與碁
敵手不覺平時劣青岡鶴唳走先聲捷書上床屐齒折

局中勝負俄今古身後功名謾豪傑何如山中靜相對
風度幽篁韻清絕林深有客遇神機柯爛無人傳妙訣
白頭老姥獨解事化作仙禽欲饒舌石枰落子忽驚飛
五月驪山啄殘雪



欽定四庫全書

集部
牆東類稿卷十七

詳校官中書臣閔思毅

主事臣呂雲棟覆勘

謄錄監生臣朱起鳳

欽定四庫全書

牆東類稿卷十七

元 陸文圭 撰

五言律詩

四月八日偕張菊村鄧匪石洪樂閑遊城西諸
寺以山高水長分韻得長字

門外青山寺西行半里強
童分泉茗潔僧供飯蔬香
地僻紅塵靜心閑白日長
少年餘氣習棋酒愧疎狂

春雨歎

山城春強半雨脚亂如麻潤麥還傷麥催花又落花閑
來憂歲事老去惜年華卧聽空簷滴應無夢到家

驟雨

絳帳虛堂設簷牙雨驟傾已過驚蟄日未聽候虫聲向
晚飛蚊出偏工傍耳鳴山靈戲窮士邀喝夜相迎

立冬

早久何當雨秋深漸入冬黃花猶帶露紅葉已隨風邊
思吹寒角村歌相晚春籬門日高卧衰懶愧無功

夏港道中

微暖背曝日輕寒面受風
人行官路側鵲起野田中
細草陳根綠疎林病葉紅
故人雲水隔來往愧衰翁

高郵寶應道中

長淮昔戰爭廢地少人耕
野壁三家市官亭十里程
田夫時識字水鳥不知名
薄暮宿何處孤雲又一城

客中度歲

歷遍青徐路東風送入京
車中守殘歲道上拜新正
椒

酒今誰獻桃符舊未更故園梅正發不見玉崢嶸

喜雨上理同知

蒼蒼雖莫測誠意儘能回履草穿雲去爐香帶雨來神龍如有喜旱魃不成災四野車聲歇懽聲却似雷

贊王容溪

勁竹持高節餘花表晚香一瓢顏子巷六籍鄭公鄉後學師珪行先天發寶藏空攜經世具獨立暮山蒼

和宋春卿寄詩韻二首

練江詩酒社聚散十年春君作并州客身為絳縣人一
牛甘送老五馬未全貧出處嗟殊異相思意却真

壯游不知倦老境怕逢春自分無知己何堪從避人飛
花室有恨巢燕不嫌貧獨憶延陵客風流似季真

和誼齋惠詩

鴉室徒勞甚鳩居柰拙何田園空歲晚梅柳得春多徑
合思除蔓壙高許附蘿呼兒淨掃地恐有故人過

和心困雷雨地震詩

天公惡作劇，翻手變炎涼。海運三山動，江高數尺彊。震雷驚失匕，漏雨苦移床。不慮填溝壑，真成老更狂。

奉和子華秋懷四首

九日秋懷惡，那禁暑氣隆。苦吟愁作祟，多病藥無功。有客來相訪，扃門弗為通。怕談當世事，遺患及孩童。

況值艱難日，那當老病身。後生欺舊輩，俗吏笑高人。易掃張超霧，難清庾亮塵。鹽梅正相得，鼎鼐盍調新。

痛飲消愁酒，愁城未肯降。陰風吹北戶，斜日上西牕。艱

食懸禾畝苛征及葦江何曾入官府深愧鹿門龐
得志瘼民瘼何期與願違青燈疎簡冊黃土污征衣道
路嗟于役山川賦式微秋風動鱸興應不踐危機

和唐人閑字韻詩卷

鼎鼎百年內何由一日閑衝冠無怒髮攬鏡已蒼顏未
易桴浮海應難屐上山春逢甲子雨愁聽溜潺潺

贈游士艾介翁

三江懷故國七澤弔孤臣有客詩招隱何心賦問鈞明

時無棄士晚節少全人游子歸何日農工已及春

丁酉春識慶上人于錢塘鄧君善之索余同賦
孝僧詩余請以二十字盡記其實既成善之喜
而書之不知何人持去後二年上人訪余江上
復書以遺之

襁褓已離乳干戈復異居闕河行欲盡母子遂如初卓
行先賢傳前緣釋氏書悲歡知已極讚詠欲何如

贈潘道士祈雨

日者旱太甚天乎禱有諸震雷驚破柱驟雨喜隨車精
意通無間神功斂不居魯侯明德頌好接有年書

送劉青壁湖北道按察

飄然南去客使者趣揚舲白帝秋雲滑黃牛暮雨腥尋
詩行楚甸問酒宿巴汀北道人多朴無詞到訟庭

送班同知

專城鎮西土世祿食南方紈袴洗餘習簪纓襲舊芳高
風仰喬木遺愛指甘棠他日循良傳應留姓字香

送楊伯可赴省

秋水芙蓉幙時聞嘯諾歌簿書精力盡臺省故人多別
酒禁愁得交情奈久何懷君四德備廉正復謙和

丙申歲侯仲達之官洪澤

淮楚俗輕揚蕭蕭古戰場殘兵空壁壘曠野失農桑魚
蟹西風市旅蒲淺水塘君山足詩景何事訪漁郎

送王縣尹之官湘潭

江亭重執手雪壓暮潮平臺閣踰三載絃歌又一城遺

鄉因楚俗令尹似湘清別駕余知己分廷託寄聲

送郭仁卿之官三衢

憲府自清要胡為墮冗曹平反猶用恕糾錄肯辭勞才
富家何瘠官卑志愈高青雲遲得路勝我落蓬蒿

送吳次尹惠州巡檢

萬古羅浮洞江樓著老坡子西相繼出廷秀晚經過欲
訪先賢去其如遠道何天寒與君別莫聽戾戾歌

察罕布哈教授滿別

原注丁卯鄉試第一
三舉不中保充掌書

小却官雖晚先登藝最優文章九州外科目萬人頭桂
折金天月芹空泮水秋澄清賴君輩憲府正旁搜

送廣平孫教授

廣平河水北古暨浙江南兩地音郵濶三年官況諳采
芹聊共樂食蘼豈能甘別酒黃梅浦情懷老不堪

送句景范教授之官澧浦

南楚離騷國清風澧有蘭相從泮水樂獨棹一江寒遠
地重逢少新知欲別難高平讀書室好為掃荒殘

送張慎與歸海陵侍養二首

湖風吹柳絮記別一年餘君出當歸養吾窮久索居乍
逢論繾綣欲別又躊躇一葦長江隔時時卜鯉魚

英才銷落盡世事一凭欄以我相思切知君欲別難暮
雲南國暝早鴈北江寒獨羨萊衣樂春風鬢未皤

送周子華南歸二首

江城少公事幙府得詩人乍見顏如舊相思意轉親不
堪時事改贏得鬢毛新後夜孤舟別西風漾月輪

此日與君別重逢未有期衰年行欲盡近事或難知浩
蕩風雲會蕭條草木悲三吳多俊傑試與問安危

送魏叔華歸越

閱世滄江上柴門幾送迎雲泥雖異路車笠見交情春
雨西興渡梅花古粵城寄聲賣樵叟莫羨錦衣榮

送長蘆穆生歸鄉來別

聞君返桑梓老我屏丘樊命駕輕千里臨歧贈一言為
山方進簣有水必觀濶顏孟千年在遺經得盡繡

送張仁卿二首

四海張公子騰書盛贊賢論心纔幾日屈指遂經年
鵲案翻新牘鷄憲理舊編遲君得小暇已索贈遊篇
作縣徒勞爾飛黃服短轅棄官真不惡惜別却無言再
試知何地孤生老是村去逢南國友梅嶺正花繁

送李正齋

龔黃吁已遠循吏捨公誰卧轍留行色歸裝減到時朝
爭馳薦剡郡議立生祠寂寂燕臺客難酬國士知

送唐子華

海內多英俊交情得似君
慇懃別後語嗚咽病中聞
吟棹秋溪月歸帆晚浦雲
可憐江樹隔何日更論文

送龐西山

行李不盈車西風兩鬢華
歷官多在考歸蜀已無家人
去空芹水舟行及藕花飛騰
君有日吾計老桑麻

送汪太無道人

面帶青山色道人何處來
一壺懸日月兩袖裹風雷
鉤

鼎養活火寒爐撥死灰出尋方外友不語又空回

送麻姑山道人

麻姑一女子處處有仙壇地古留遺跡君今住此山
流泉清澗底落日亂峯間聞有蔡經者時時得往還

病中寄諸友

五福人間有吾無疾與貧死寧遭疫鬼生不媚錢神採
藥思方士貽書荷故人城東有別墅風雨失殘春

病枕

蕭蕭風雨夜病枕厭長更輾轉終無寐呻吟不絕聲鼠
牙乘壁暗鷄翼報窓明辛苦床前婢頻呼睡不驚

病枕不寐

大率憂無病尤非老所宜吟愁枯兩鬢時事鎖雙眉瘦
削嫌衾薄醒眠覺漏遲拒霜三五朶應愛北風吹

病足

筋寒苦蹠繻尊足詎能勝誰謂行多露全如履薄冰城
非靴可踢堦豈鞢堪登設有蒲輪召安車未易乘

許正卿傷臂

危機在平地險不是丘陵偶爾一投足幾乎三折肱鞠
躬難盡力攘臂必須繩他日三公貴輶車好穩乘

題張招討墓碑

輕兵戒深入險寇勿窮追失勢因魚服留名有豹皮空
歸先軫面竟裴伏波尸廟食真無愧嵯峨死節碑

題孔平山墓銘

原注 葬金
陵臺下

東魯家猶在尼山道最尊教能行萬世福不庇諸孫薄

宦三千里遺銘數百言不埋防墓側空弔雨花魂

挽閑閑真人父司徒

堂堂遺一老五福壽而康系出安仁譜身居榮祿鄉春

山樵獨隱晚園菊尤香有子知何憾騎龍下大荒

原注
樵隱

晚香
堂名

挽朱自齋總管

郡紱雖重綰齋銘祇自脩陰功淮海積遺愛浙江留世
事桑田水人生殯露秋蓋棺奚復憾簫鼓咽原頭

挽貢仲章學士

才優如貢禹經行復精純海內多知己江東尚有人林

泉隱君子臺閣古名臣九轉丹成去青山宰木春

原注
貢臨

終夢九轉丹成
生羽翼之句

挽吳朝奉

幼時桑梓敬耆舊惜凋殘蕭誠師吾儉龐言遺以安天

乎非不壽命也亦何歎誰筆延陵墓嗚呼永不刊

原注
申浦

季子墓有嗚呼有吳延陵君
子之墓十字相傳夫子之筆

挽許士元州判

有數應前定浮生難豫期為親嘗藥去俄自載喪歸循吏堪為傳遺民議立祠靈輻無路送老淚不勝揮

李君美夫婦挽詩二首

君家全盛日父子佩金魚太母嘗甘旨曾孫列起居榮華既消歇憂患却乘除執紼門生老何堪數輓車

一死人誰免如君獨可哀離鸞不忍訣止鵬併成災從吏聯翩去喪車寂寞回淵明本無疾早歲賦歸來

挽孔東岡

此老典刑在粹然瞻德容百年守經學一邑號儒宗泗
水乾別派泰山摧小峯孝哉廬墓子滴淚死青松

挽沈梅溪

原注其子
元從子學

未游通德里曾識謝家兒鄉邑推先輩山林養令姿梅
花記開落江水閱興衰耆舊凋零盡西風老淚垂

挽趙石居

地望掄魁重氷銜博士清棄官為隱計因謗得詩名水

竹方成趣松楸忽愴情鄉中耆舊盡老淚洒銘旌

挽李德夫

一種金籬業相傳五世餘貧同司馬壁富有善和書四
子供甘旨諸生問起居典刑無復在丹旌泣隨車

挽柴青山

衣冠百世祀齒德一時尊白馬朝京客青山負郭門廢
興疑有數生死復何言空有懷賢淚西風滴古原

挽何漢卿

被服安儒素行藏任性真
終于太平世奪我老成人
喬木蒼蒼古孫枝奕奕新
西鄰聞夜笛哀淚一霑巾

挽朱南伯

爵齒不踰德天乎奪此君
官纔稱主簿郎已轉修文
玉質埋黃壤葩辭散彩雲
從今書帶草不獨鄭公墳

挽謝竹所

江左稱羣謝青山幾夕陽
田園遺一老詩禮訓諸郎
勝日攜樽樂清風隱几忘
靈輶無路送東望涕霑裳

金史四庫全書
卷十七
挽杜華父

鄉里多遺老朝廷少用儒公初升國學官止教生徒衛
道心猶壯憂時骨已臞遙知埋玉處風雨暗山隅

挽趙鼎之

太息佳公子樽中了此生吐茵人不怒罵坐客皆驚北
闕名垂就南柯夢已成老親併弱子此恨若為平

挽榕山陳同年

勞勞百年內人物老滄洲大志生難測微官病即休江

花自終古榕樹不禁秋
雌甲嗟猶在哀詞淚不收

挽邱景游二首

粹德如金玉鄉人稱善人
百年蔭喬木五子拱靈椿
桂管經行路蒲龕宴坐身
今歸兜率去弔客謾霑巾

游公門下久公亦眷吾
深疾病煩憂卜詩詞辱賞音衰
年空滴淚舊事獨傷心
秉筆書潛德空疎力不任

挽俞時齋

襄陽耆舊傳一覽涕無從
入社深衣叟齋居糲食翁
市

朝終不到林澗或相逢有子能傳業棺衾得慎終

立齋挽詩

少日增庭秀暮年山澤臞吟魂繞花竹客淚灑江湖莫
唱貞元曲空遺洛社圖絕憐埋片玉幸喜產雙珠

挽陳葵心

遺才今已老生計晚方宜卧病經旬月孤墳寄一隅逢
原惟有女伯道竟無兒執紼嗟何及哀詞與淚俱

挽何有開

捧檄垂三考還家甫一旬風雲千里志露電百年身講
席辭多士帷堂泣老親三生有遺恨五福少全人

代挽奉政陳公

江淮離舊隱遼碣著新功駮耳非凡馬蒼髯獨老龍韓
銘空紀實曾箚遂長終先世盟猶在寒山淚滴松

故夫人陳氏挽章四首

誓節攜孤幼塵奩不復粧夜機同婦織曉隴課僮秧甘
旨期終養哀榮畢後喪前岡指陶墓弔鶴重淒涼

白首萱堂上兒孫卓有成膝前分栗果枕上聽書聲鳳
誥將金闕鸞驂遽玉京舍西蘿月夜鳴咽隴泉鳴

憶昨升堂拜通家指舊盟為言兒有立多賴友相成喜
檄方形色哀銘忽愴情生蜀一掬淚端為玉人傾

萱草北堂深霜風一夕侵斷機思往訓捧檄負初心仙
府雲輶遠佳城月魄陰平生五鼎養空復美衣衾

五言長律

送衛月山歸鄉

原注大魁
涇之孫

臚傳居第一科目艷當年慷慨誅奸佞從容秉政權諸
孫今白屋舊物止青氈幾見黃梁熟何當鐵硯穿書聲
月廡下燈影雨窻前學者師王式時人老伏虔不令官
濟濟空負腹便便桑椹鵲偏惡桐花鳳可憐縱無當食
祿猶有可耕田卒卒纔傾蓋依依願執鞭二翁俱耄矣
一別重淒然握手出門去桂花香滿船

挽張宗師

鳳歷歸明主龍韜識老臣衣冠朝日月劔履步星辰極

品躋黃閣齋居入紫宸存心妙經緯贊化極彌綸道教
崇簪笏詞林壓搢紳儵慈為世寶安樂是天民夢卜親
如見祈禳立有神穀城黃石老衡岳白衣人密勿天心
契便蕃帝渥新壽尊來玉醴法樂宴崇真重錦頌衣襲
精糜享膳珍青溪合瑤草玄圃植靈椿化鶴聲逾遠飛
鳬跡已陳松青凋晚歲林繻失殘春世事柯山局人生
桑海塵十齡傳正印一德鏤堅珉

挽吳野堂

保護兵衝日焦勞歲歉時江湖一老重州里百年思家
尚玄元學人遵義役規陰功宜有後隱德固應祠擬作
榮鄉記誰鑄有道碑碧梧雖未識宿草尚堪悲偶泊梅
江堰空吟薤露詩

欽定四庫全書

牆東類稿卷十八

元 陸文圭 撰

七言律詩

洛中鄭慤三伏之際率賓僚避暑于使君林取
大蓮葉盛酒以簪刺葉令與柄通屈莖輪囷如

象鼻馬傳吸之名碧筒盃故坡詩云碧碗猶作

象鼻彎白酒時帶蓮心苦

原注出雞跖集

丙寅五月宜

興州賞誠以此為題為賦十一首

外直中通異衆芳，嗅來葉氣勝花香。一盃先吸鑑湖月，
滿口潛消玉井霜。尤勝朱櫻煎作蜜，何須紫蔗壓為漿。
細看象鼻彎彎曲，刺手猶嫌綠柄長。

昔宴賓僚避暑林，傳盃故事到如今。屈莖聊當黃金杓，
刺葉先抽碧玉簪。聞得鼻端香馥馥，流從舌底味森森。
坡仙愛釀柑為酒，却道清蓮帶苦心。

有客相傳避暑方，採蓮不用採花房。綠盤擎重盛珠露，
碧管虛中溜玉漿。象鼻捲風隨手曲，麝臍入水透肌香。

醒來忽憶涪翁句摘實分甘共母嘗

碧雲影裏倚欄干鯨吸詩人酒量寬惟有鑑湖堪避暑
遙知玉井正生寒簷開翡翠微通竅滴下真珠滿走盤
一葉偶因風颭破帕羅香沁幾時乾

荷亭避暑約傳盃醉引清風入手來象鼻形彎通曲柄
鴨頭色重潑新醅中擎玉液休傾滿半捲青心莫展開
春酒一江能吸盡始知李白是仙才

當年避暑使君林暇日諸賢肯過臨荷帶露香須緩折

酒無風韻莫輕斟玉簪先透玲瓏玉金注徐傾潋灩金
葉底可能甘勝蜜却憐小苦是蓮心

不須酒盞吸雲紅刺葉潛令與柄通碧色輪囷彎到底
黃流潋灩注當中醉來欲捉波心月醒後因吹水面風
却笑求仙求不得金莖半折露盤空

原注魏明帝移長安金人露盤盤折

聲聞
百里

露盤淨植水中央好借詩人引玉觴象鼻巧能通葉柄
馬蹄更與摘蓮房

原注溫公蓮子
詩形如大馬蹄

吸川不覺西湖闊漱

石尤便玉井涼醉裏興來休折遍也留數葉覆鴛鴦
越溪女子翠紅裳來與羣仙侑一觴葉展圓盤如許大
絲連曲柄更能長清高勝飲金莖露甘滑疑餐玉殢霜
醉手傳盃猶未穩碧痕微損迸瓊漿

樽壘自古宴嘉賓末世風流意轉新筒葉捲來由鄭氏
杯荷製出始唐人一時花草空傳玩他日賓僚但飲醇
外直中通比君子輸他光霽滿懷春

刺葉為筍製頗奇鄭公故事老坡詩擎來入手成歌器

注在當心即漏卮玉露有香麝翡翠碧雲無影浸琉璃

假饒吸盡西江水鉢内生蓮是幾時

原注佛圖澄取水燒香呪之鉢中生

青蓮花

孟德孔明

孔明孟德兩馳驅三國人才信有餘
未肯草廬終此世不知精舍讀何書
木牛古不傳遺法銅雀今成一廢墟
畢竟忠邪天不識當年成敗復何如

與琴師談琴

至樂無聲識者希有聲終是假人為一時得趣惟元亮
千載知音欠子期欲寫性情初動處當原律呂未生時
夜寒月照虛堂壁鶴唳猿吟摠是詩

癸酉三月園亭小飲之明日又適澹齋所薄暮
醉歸廣文寄佳句二首走筆次韻

名花濃淡總相宜對此如何不醉歸絲竹既無娛朗日
園林可是樂清時蛙聲閣閣那成部蝶陣團團戲作圍
酸杏不堪嘗煮酒纍垂空自壓青枝

綠陰未暗漸紅稀逢閨春遲一月歸古有惜花如子美
今無好客似當時酒雖薄薄聊澆渴棋亦平平旋解圍
斜日倚闌人半醒試尋青子摘梅枝

同善之仲寔無逸遊飲夜歸分韻得星字

歲華搖落江頭樹客子漂流海上萍盡染緇衣無復素
空留白眼為誰青對床便可供高卧把酒何妨弔獨醒
太息此心徒炯炯柰何余髮已星星

八月初游君山誼齋有詩同賦二首

曉渚風移畫舫輕秋原日射繡衣明白攜玉麈看山色
盡屏繁絃聽水聲季子高風喬木古春申往事暮潮平
塔鈴自語無人會飲散江空霽月生

此山猶姓楚春申珠履風流幾斛塵樽俎一時俱上客
興亡千載屬何人蕭蕭病葉悲霜木采采幽花識澗蘋
白鷺不知今古事臨江一笑岸綸巾

句容賦歸

誰教老子誤諸君幸自菴中卧白雲舊令尹非新令尹

今將軍是故將軍相知自謂樂莫樂一見不如聞所聞
逋客急須回俗駕北山早已有移文

迴途入玉晨觀圖經云周時太史郭真人宅周
安得有真人哉有丹井養龍池白馬老君瑞像
在焉壁間刻林靈素塵字韻詩戲次二首

洗淨人間萬斛塵玉虛壇上夜朝真井深莫採丹泉髓
屋小難容老檜身

原注廊下有晉檜一株小屋圍之

符召得龍聊小戲

料分與鶴未全貧名山採藥無空返不見仙方見異人

太虛自是隔凡塵，惟恨神霄事不真。
泥馬空遺玄聖像，池魚恐是小龍身。
久知天上仙官貴，不救山中道士貧。
舊宅固應存太史，徽稱早已號真人。

無文上人捨財鳩工，建新安橋，普濟衆生，聞者
讚歎，隨喜賦詩一首。

高僧自有神通力，杖錫橫空搭兩堤。
曾見丈夫乘駟馬，寧無學士助腰犀。
一溪帆影浪花轉，百尺欄杆石笋齊。
有客天津閑信步，杜鵑聲裏夕陽西。

七月二十九日夜大醉宿陸宣慰廨旦日以一

詩謝之

夜行被酒止公亭耳熱呼烏坐盡驚甕下自慚非畢子
吐中不覺卧王生相寬吏舍情何厚誤污車茵罪亦輕
戲馬倘容賓落帽更拚投轄飲天明

東人索酒

不到青州已月餘麴生風味近何如東坡孟小君應怪
北海樽空客漸稀奇士正堪來問字癡人那復肯還書

分田種秫嗟何晚獨眄庭柯望白衣

中秋見梅

鴈叫霜寒木葉飛西風亭下立瑤姬從來冷淡能禁雪
不意孤高也競時松友舊盟寒歲晚桂華佳約赴秋期

倚窻索笑空姝媚汝解能寬宋玉悲

原注坡詩奔月
偶桂成幽香

十月下旬驟寒小雪

朔風翻屋浪喧飗潑墨濃陰掃不開天下撒來雲母粉
人間喚作豆稽灰細民共喜宜新麥老子先須探早梅

卷十八
為怕玉容禁不得數枝和淚折將來

雪江獨釣

極浦寒雲壓鴈低
石磯老叟手如龜
茫茫沙上銀千頃
裊裊風前玉一絲
鷺失蘆花驚月早
魚吹柳絮上冰遲
故人物色嫌相認
縱有羊裘不敢披

虎丘留題辛卯三月書于劍池

霸業荒丘春草長
只聽兒女話真娘
虎來墓上猶應怪
鹿入宮中儘可傷
太息乾坤空浩蕩
不留豪傑管興亡

屬鏤抱恨沈江底潭碧猶生古劍光

辛卯入杭呈王察判

中州人物古猶今復見風流正始音當日乘驄持繡斧
他年化鶴度青林誰知救世安民術即是求仙訪道心
鯨浪駕風吹未散溪山何處獨追尋

古人糟粕在遺經聖學非由積累成每向同中參孔釋
時於異處別朱程一川水滿源頭活半夜天高月色明
下學工夫遲十載小儒終是霧中行

入杭懷古呈史葯房

某丘某水記兒時陳迹迷茫問不知
觀裏看花空有菜
山南種豆落為箕
林疎想弋逋仙鶴
壁壞應墁坡老詩
只怪西湖頑面目
濃粧猶自學西施

浙西道院并題雙檜詩

和子
華韵

黃堂曾著宰官身
髣髴兒時記不真
圖誌雖存千載舊
棟梁安有百年新
繁華開落無三日
雙檜輪囷經幾春
應比首陽高節士
採薇不食為求仁

苦雨

積雨能令朱夏寒，少曾見日上三竿。
風吹滄海俄然立，水瀉銀河透底乾。
誰辨好心來拯溺，姑留老眼去觀瀾。
蛙聲只在牆根草，却怪泥龍不久蟠。

居高明

每愁仲夏多溽暑，更逢今歲少南風。
身無臺榭可獨處，眼到山川便不同。
直從月令高明處，參透中庸問學功。
虛靜若能超物外，炎涼何必介胷中。

七夕祈雨

彩雲朵朵西風散銀漢昭昭北斗傾
車上耕夫愁欲泣橋邊織女笑相迎
蝗飛近境行將及龍卧深淵自不驚
病枕怕聞簫鼓鬧誰家乞巧到天明

偶書邸壁

俯仰隨人似桔槔功名落落倦英豪
婆婆娑娑僅可供賓戲寂寞安能免
客嘲空有雲心懷鶴髮竟無風力舉
鴻毛祖劉起舞成何事歲晚柴桑是
故交

效後村體

十載村居學養恬未忘習氣有人嫌課僮薙草心先快
助僕移梅力尚無不分烏鴉啼錦樹絕憐紫燕傍茅簷
路逢野老閒相問新歲凶穰可豫占

有感三首

塲屋當年負雋聲白頭牢落竟何成一生受用兔園冊
千載應無麟閣名被服易招山鳥怪題詩難學野狐精
羊裘老棄漁灘上印綬新加少傅榮

原注桓榮也

子美間關離亂際堯夫生長太平年可憐橡栗天寒拾
不似鶯花日晏眠憂樂在人均是命盛衰有數總由天
腐儒老矣無奇計獨立斜陽意惘然

歲晚田園半已蕪緇塵袞袞落征途送窮不見昌黎富
乞巧翻成子厚愚甌下早知嘲尚白缶邊何似醉呼烏
鳶肩枉作常何客只合新豐伴酒徒

闕題

區區抱甕不辭勞俯仰安能似桔槔兒子從教耀車服

大夫何用樹旌旄但思有酒身無事始信求田策最高
妄想虛憍無處著退然斂手是英豪

黃山上先冢舊葬處

一盂麥飯一豚肩寒食風花淚眼邊倘得黃泉相見母
勝如白日上升天萬家置去成何用雙鶴飛來亦偶然
事死如生莫言孝幾曾廬墓過三年

庚午三月初九日寒食有感

祭筵跪拜膝難撻連歲何曾上冢來老子七旬看又過

幻身多病復相催人間願棄姑云耳地下從遊亦壯哉
寒食江村舊行路道旁相弔總悲哀

連日食粥兒輩愠見示之以詩

抄書燈下語吾兒歟歲艱辛汝未知坡老忍飢常并日
少游厭粥亦多時但令後世師吾儉深怪諸人遺以危
天意從今吾儘解窮人大抵欲昌詩

耳聾二首

幾年本分做家公雖是癡頑幸不聾何必張皇驚鬪蟻

更須辛苦望攀龍
濕窓暗想催花雨
開戶遙知度竹風
問夜何其將夜半
元來野寺已鳴鐘

血氣衰微性不靈
非是是幾曾聽胃
中不著許多事
天下本來無正聲
但覺颼颼戰風雨
誰知飈飈震雷霆
先生耐靜坐終日
怪底作勞吾耳鳴

齋科詔使臣索詩

紫泥詔下九重天
文治初興正急賢
草木輝光霑雨露
鳶魚鼓舞樂天淵
雲衢接武懷新渥
雪案潛心理舊編

禮樂三千攄素蘊丹墀他日聽臚傳

贄楊子裕中丞

堂堂四世三公後今日乘驄出案臨坐上即時聞減樂
袖中雖暮不懷金官民乘訪皆公論獄卒平成有恕心
古栢臺邊霜氣冽肯分春意到寒林

贄尤端木二首

漢家陵闕已蒼煙魯國靈光獨巋然衛玠音聞永嘉末
陶潛詩著義熙前可憐閣下投幾死不及車中寢獲全

原注范
樂事

寄語牙郎莫酬價匱中韞玉可求旃

萬里梯航走貢珍乾坤無地著孤臣湘江空記庚寅渡
石壁曾題癸巳人國士猶嫌先事范仙家莫問幾經秦
願提草履從君後煮茗寒泉代拾薪

代上樂平傅知州初菴

一代風流獨老菴再扶道脈起東南家聲可與諸洪繼
易學曾同小阮參畫錦羨君榮世胄寒韞容我坐清談
願為藥籠中間物才匪芝苓愧不堪

壽常州路達嚕噶齊

蓬山閣上冠羣賢出擁朱旂淞水邊但看兩州歌善政
宜膺多福享遐年當生自是長生佛未老應為不老仙
欲就瓣香稱壽去梅林一夕漲江天

壽與可錄判

濯錦峩峩誇最勝子昂太白記前生一川風雨睡正熟
千頃波濤心不驚手試功名基勝負眼看富貴槿枯榮
壽盃肯向人間飲攜傍蓮峯玉井傾

壽陸雲閑道判

誕日曾生陸地花

原注關尹喜生時陸地生蓮花

雙鸞扶下五雲車安

期共約游三島方朔應留醉九霞盛集儒流勝仙侶多
培陰德種丹砂冷齋書客來稱壽自笑東風兩鬢華

史葯房壽與東坡同日

日月同生豈偶然聲名不減雪堂仙岷峨西去八千里
蘇史相望二百年赤壁舊磯如昨否李生新曲至今傳
祝公壽比南飛鶴共結梅花歲歲緣

壽陸義齋

原注乙巳九月自五羊歸

歸棹石門江水長肯留一片廣州香不須人祝千年壽
但願公流百世芳長侍潘輿游故里勝持漢節落南荒
芙蓉金菊秋風逕好和陶辭引玉觴

綠髮仙童馭彩鸞九秋彌節下人間明分月影山河動
清入霜華草木寒已報除書來北闕不妨拄笏看西山
霞盃淺注黃花酒留取餘香晚節看

壽李侍郎母

雙成遙下五雲車獻壽仙
盃吸紫霞愛惜孫枝長萱草
摩挲老樹著桃花斑衣就養榮
三釜錦誥分封備六珈
他日肩輿扶上殿侍郎正踏相堤沙

寄戴帥初先生

詞章科目溯當年璧水名流孰子先
杜甫生逢天寶末
陶潛空憶義熙前
明庭結綬懷新渥
暗壁移燈理舊編
約對青山譚出處
一冬澗雪長新泉

和陳無逸見贈草堂詩韻

卷十八
綈袍誰念故人寒轉徙蕭然老伯鸞
幸喜雲山無屋礙
始知天地出門寬
悠悠歲月蟻旋磨
落落功名魚上竿
金谷已無歌舞地
輞川猶有畫圖看

郡幕請講書和葯房先生韻

不為祁寒暫輟冬
肯移蓮幕下芹宮
深青豈必從藍出
美玉何煩就石礮
殘雪五更侵几白
一燈深夜照書紅
他年共赴長安召
正恐諸儒却誦通

和蔣公秉思歸韻

原注時寓
普明後寺

不愁世路大行難自歎行藏愧孔顏借榻寺中分兩寺

原注白樂天詩兩寺元從一寺分

思鄉山上又重山淒然碧草天連遠

輸與白雲僧對閒我亦天涯流落客何時同賦大刀還

和郭有章見贈韻

原注郭宣城人

敬亭山屬謝家詩太白重來又一奇天既生才宜用世

士多有志不逢時屠龍合讓高人手捫虱纔堪童子師

大廈支顛要梁木獨甘杞菊老天隨

和陸振之見寄韻

日長不廢讀書功我與宗人老頗同病起自羞黃面老
興來人笑白頭翁剖瓜未信能祈巧結柳終須學送窮
樽酒論文定何日碧雲暮合憶江東

代和翟知事舟中寄登光陽樓詩韻

登臨送目際天涯人物風流勝永嘉已泝清流乘畫鷁
尚留醉墨看塗鴉長空黯淡吹雲葉別浦微茫蹴浪花
老守江城閑兀坐秋宵短夢苦思家

和劉濬見贄韻

踽踽涼涼莫我知，讀書漸懶任嘲師。
荷鉏亦欲耕綿上，把釣因思入漢陂。
姑讓著鞭先士雅，何須舉扇障元規。
已人白雪難同調，今古應無兩子期。

和鄧善之寄王一初并見東韻

抱拙投閑計未疎，但看歲晏復何如。
丹山碧水吟招隱，白髮蒼顏賦遂初。
逸少幽情誰與暢，元龍豪氣未全除。
柴門有客迂雙屐，何不相逢許史廬。

和戴帥初寄詩韻

原注詩云清江一日走千艘，獨有閑仙不喜遊。幾處白雲

思暮合數行紅
樹又秋高云云

入海逢車陸用艘仁人不遇歎游遨登龍有意師元禮
刻鵠何心效伯高每笑囚山非國語絕憐投閣反離騷
此身幸免官驅使兩手猶能把酒螯

次樊晉山長贄見韻二首

閉戶柴車久不巾但思言行謹書紳可憐麋鹿山中友
不是麒麟閣上人作賦也應曾感舊為師那敢望知新
老饕誰獻先生壽自酌蒲桃舞鬱輪

我羨君才桂一枝天門步擔束書歸藥方按古藏芝籠
花樣翻新織錦機不恥緼袍身自貴能知璞玉世尤稀
天寒野曠來時路一笑應疑吾道非

次韻袁艮所投贈

意氣冲霄義薄雲白頭傾蓋即相親耳邊久不聞瑰論
眼底初驚見玉人歷代文章空自變致君風俗幾時淳
世間別有經綸手不屬柴門老病身

次鄭前山絲字韻

人笑學官如兔絲

原注出南北史

誰能千里遠尋師歸田便覺

知機早春市應嫵見事遲縱欲著鞭何所往奚須按劍
復相疑世人多享容容福白璧從來不可為

留別王伯洪平章高顯卿左丞

幼從翰墨場中出晚見車書寓內同四十年前沾雨露
三千里外犯霜風蛾眉共妬嬋娟女鶴髮誰憐矍鑠翁
回首東書歸舊隱江南筍蕨滿山中

別管韶夫

胸中耿耿挾孤征，刺口逢人輒論兵。
少年真燕領，著鞭中夜忽鷄聲。
功名險處方成就，節義窮時要講明。
別有中庸書一卷，勸君西謁范高平。

送元帥移屯太倉

十乘元戎又啓行，澄川老稚送傾城。
北風吹轉旌旗影，東海懽騰鼓吹聲。
桑麥千村無吠犬，波濤萬里息奔鯨。
新年鳳詔催歸覲，殿內金甌覆姓名。

送陸誼齋按察

使星出照三吳地原隰馳驅遠有光鷹擊何如學鸞鳳
狐多且莫問豺狼懷金昌邑難污震置酒清河反怒章
今日故人無請託他年鴻燕勿相忘

送葉敏卿提領

墻東老檜屋三間几案亭亭背遠山時事浮雲蒼狗變
機心滄海白鷗閒歸與乍出紅蓮幙行矣催歸玉笋班
老子婆娑今得計底須坐客唱陽關

送嚴簡卿之燕為司徒掾

漢儒多辟司徒掾掾屬雖卑地望高聞有袁安在公府

可無陳寵作辭曹

原注漢陳寵少為州郡吏辟司徒鮑昱府是時三府掾屬專尚交游以不

肯視事為高寵獨勤心物務昱高其能轉為辭曹掌天下獄事脩鯨未肯隨鱗介威鳳

終須現羽毛少壯功名當拾取金臺落日射征袍

送劉侯之官吉州

暨州美政不三年江右遺民借二天皂蓋朱轡新牧守
青原白鷺舊山川邦衡奏疏雲中有永叔詩章洛下傳
故里諸孫無恙否下車第一表先賢

送侯仲達安豐之任

江上故人今送別，淮頭往事獨淒涼。
陂成孫叔能強楚，城破劉公不負唐。
千載與君期事業，一區憐我老耕桑。
昇平幙府應多暇，書問時時遠寄將。

送州官解任

小郡凋零不可為，長官賢厚莫能欺。
政聲鄰邑皆傳說，心事同僚盡得知。
堪笑青蠅工點污，敢將白璧強瑕疵。
清時公論終難泯，遺愛空留去後思。

送張文友州判

太息君侯有祖風
栖栖五載簿書叢
功臣昔繪雲臺上
循吏今標漢傳中
綠水江風送行色
紫金關月照孤忠
預人家國非吾事
但喜詩書氣味同

送丘景唐赴安豐教

原注宗卿宣撫樞密之孫

元樞出督宣威地名姓江淮草木知今見聞孫騎款段
去為博士擁臯比詩書澤遠真難繼功業時來亦可為
往事百年無處問慶豐亭下稻連陂

送朱伯海入京

燕黍寒生春未回，可堪早別故園梅。
新豐斗酒馬周去，京兆束書韓愈來。
賦就不須呈狗監，勅除先合拜鸞臺。
青雲附驥非吾願，自守書燈撥冷灰。

送朱鶴臯入京

故人天上調金鼎，應念先生首著盤。
博士不煩重講席，拾遺無復歎儒冠。
蓬萊海闊還須險，太華峯高不道寒。
茅屋三間老書客，逢人懶問日長安。

送王居實遊金陵

破氈吟雪擁清寒有客虬髯急扣關歲月蒼茫千里暮
乾坤博大幾人閑依來自許風雲際邂逅相逢草澤間
西上月林春未半白鷗黃鵠看江山

送李義夫出遊二首

與君卯角志相期歲晏行藏各有違老樹晚花空自媚
秋林病葉更先稀時情淡薄元無味世路艱危總是機
門外北風吹自冽旅人瑣瑣欲安歸

少年有志東山卧晚歲方圖北海遊餬口飢寧甘半菽
拄胃氣尚食金牛問唐元振今誰在欲趙平原何處求
赤白洪崖兩相厄不妨詩句各風流

送魏叔華歸杭州得行字

青山出郭兩相迎潮去潮回客子程門外送車今幾輛
筵中祝酒已三行對床有弟酬佳約擁髻何人訴別情
桂樹結花當洒掃重來曾指白鷗盟

杜康橋下水如傾九里岡頭路轉城風雨小樓清夢遠

山河古道幾人行別懷漸覺傷安石祖席何曾傲正平

原注是日
饒之不至

珍重去逢南國友為言白髮老書檠

餞劉繼明西歸

原注同
知子

人生有三事如一父子師友皆人倫
入向親闈奉甘旨
出當書案服辛勤
老成識見無如子
少壯功名肯讓人
老我卑枝棲鷁爵
仰看黃鵠上青雲

送劉中齋孫歸三衢

百花頭上和羹手
乃祖聲名似孝先
太息北朝開府老

真成故里爛柯僊慶流冢嗣承先澤學到孫枝又一傳
野叟臨歧無別語勤修世業復青氈

題桃源手卷

原注武陵今鼎州常德路桃源山在縣北二十里古跡無復遺或謂

此記淵明寓言即義熙題甲子耻事二姓之驗也豈為束帶見鄉里小兒然後歸隱哉師摠管出示此圖為述此意

種柳栽桃摠是春興亡千古一沾巾只評隱者非仙者
莫悟秦人即晉人年號記曾題甲子兒孫肯使識君臣
南陽高士空遐想不向柴桑去問津

題三洲詩卷

潮擁寒沙足練長東南人物老江鄉藕花秋晚吳霜落
杜若春深楚水香閑對漁樵談治亂貪看鷗鷺失興亡
無人會得乘桴意東面區區嘆海洋

題陸義齋雙蓮圖

紅粉香中雙並蒂碧絲藕下暗連株主人一笑偶然爾
客子競誇前所無堂上壻篋兄兄弟房中琴瑟婦隨夫
君家和氣濃如酒此即雙蓮瑞慶圖

強南坡自作墓銘生求挽詩

年光催客過郵亭八十餘翁尚典刑
見說近成遺老傳未當上應少微星
履香竊笑空題墓寶玩何須自乞銘
今古達觀惟一士山童負鍾醉劉伶

挽吉州劉總管

畫戟清香彼一時歸舟素幔不勝悲
墳成共負健為土堂在空留蜀郡祠
亂起赤眉徐自定憂侵白髮已先衰
平原歲晚多賓客泉下難酬國士知

挽李宣慰

公騎箕尾上秋旻忍見龜趺對石麟
盛德固應祠百世陰功何止活千人
壯圖落落心空在華髮蕭蕭事轉新
耆老凋零闕世運可能知己獨沾巾

挽晉千戶

憐草原頭十七霜宛丘改卜日辰良
可憐先軫如生面疑住靈均不死鄉
抔土豈能埋宿憤遺民聊與發幽光
護喪諸子皆稱孝萬室他年置墓傍

原注啟攢面如生

卷十八
挽唐可竹

原注 亡宋兩姓鄉薦歸
附後 漂水丞終于燕

穿楊折桂黃梁夢庭下哦松白髮秋興廢乃闕千古事
榮枯肯為一身謀江南有客朝金闕天上無人記玉樓
丹旄西風范陽路行人回首憶林丘

挽孫石山二首

原注 壬辰年卒

今年星度歲為龍掩袂竟嗟吾道窮正始遺音從此絕
貞元舊曲為誰工飾棺不待百年盡隱几元知萬事空
里有水心銘筆古宜書潛德賁幽宮

榮華露槿落紛紛蒼狗依然是白雲
荆渚止稱前進士
灞亭不識故將軍
人間無樂徒勞子
天上求文即召君
楚些西風將淚去
隻鷄他日酹秋墳

弔李古巖

堂堂山立萬人英
一夕霜風玉樹傾
公去隱然關世道
客來何止哭交情
安知死不如生樂
但恨才難與命爭
幸喜肯堂丹腹手
隴西依舊振家聲

挽闕南夫

原注號實軒
乙巳年卒

惡夢無端歲在蛇先賢遺落重堪嗟粹然踐履終身實
老矣婆娑兩鬢華不見鯉庭人獨立忽驚鵬舍日西斜
定碑好為書潛德窮巷誰尋忤作家

挽陸義齋二首

四持憲節遍南方屢表陳情返故鄉殊俗今猶歌德政
老天胡不愛忠良山空虎逝狐狸出春去花殘蛺蝶忙
五十人生不稱天獨憐華髮在高堂

生平意氣每相期歲晚行藏各自知見事畧同因撫掌

憂時不語共攢眉闔棺已矣公何憾聞笛淒然我獨悲
回首秋山寒雨外青松滴淚作枯枝

挽東平張彥明

原注女事
曹安卿

夢覺黃梁僅一炊人生適意不多時杜陵老病親桃竹
白傳清閒憶柳枝有意出山尋樹檟傷心歸櫬賴門楣
秋風淚滴長江水遙寄東原薤露詩

挽黃子高

場屋初興選異才先生潤步上金臺蓬山渺渺仙舟隔

泮水悠悠講席開同是甲辰雌正伏胡然庚子鵬為災
天寒病叟那能出一東生芻寄淚來

挽丘景南

紫荆庭下列三株十五年中次第枯餘慶後來英俊有
老成先輩典刑無每懷素志甘瓢飲不覺長身要杖扶
頭白少公門下客酸風吹淚洒轉塗

蔡梅邊挽詩二首

原注
代作

樽酒吟梅憶舊遊忍聽笳鼓咽原頭曾廬栢下三年墓

退卧花間百尺樓

原注所居有前後樓

淮海壯心空落落山林晚

興寄悠悠寒窻寂寞留孤月勸孝坊前客淚流

憶昔艱難共避兵轉於貴賤見交情長江一水分南北

異姓兩家真弟兄回首忽驚人世換傷心敢負歲寒盟

空亭花月如春夢惟有清溪一帶橫

原注葬在清溪醉月坐花亭名

挽張州尹夫人

新頒五色金花誥彩服兒孫正滿堂不見魚軒隨五馬

空令鸞鏡照孤凰車中鬢老愁潘岳案上眉低憶孟光

流水無情飄素幔涼宵燕寢獨凝香

